



**Broj predmeta:** 02-000049/20  
**Broj akta:** 01.1-1141SM-339/20  
**Datum,** 5. 8. 2020. godine  
**Mjesto,** Brčko

Na osnovu člana 16. i člana 17. Zakona o Vladi Brčko distrikta Bosne i Hercegovine – prečišćeni tekst („Službeni glasnik Brčko distrikta BiH“, broj: 22/18, 49/18, 8/19, 10/19 i 32/19) i Odluke o imenovanju Štaba za zaštitu i spašavanje Brčko distrikta BiH, broj predmeta: 02-000049/20, broj akta: 01.11-0566LO-006/20 od 13. 3. 2020. godine, broj akta: 01.11-0566LO-012/20 od 13. 3. 2020. godine i broj akta: 01.11-0566LO-020/20 od 16. 3. 2020. godine, a u skladu s članom 18. tačkom o), članom 19. tačkom a), članovima 35. i 37. stavom (1) Zakona o zaštiti i spašavanju ljudi i materijalnih dobara od prirodnih i drugih nesreća u Brčko distriktu Bosne i Hercegovine („Službeni glasnik Brčko distrikta BiH“, broj: 29/16 i 33/16), Odlukom o proglašenju stanja prirodne nesreće zbog COVID-19 (korona virus), broj predmeta: 43-000096/20, broj akta: 01.1-1141SM-001/20 od 13. 3. 2020. godine, u vezi s Odlukom o proglašenju ugroženosti stanovnika Brčko distrikta BiH od epidemije zarazne bolesti – korona virusa (COVID-19), broj predmeta: 02-000049/20, broj akta: 01.11-0566LO-001/20 od 11. 3. 2020. godine i broj akta: 01.11-0566LO-003/20 od 12. 3. 2020. godine, članovima 5. i 6. Poslovnika o načinu rada i rukovođenju Štabom za zaštitu i spašavanje Brčko distrikta BiH, broj predmeta: 02-000057/20, broj akta: 01.11-0566LO-004/20 od 20. 3. 2020. godine, nakon održane telefonske sjednice Štaba, komandant Štaba gradonačelnik Brčko distrikta BiH dana 5. 8. 2020. godine i z d a j e

## **N A R E D B U**

### **Član 1.**

- (1) Ovom naredbom donose se epidemiološke preporuke za održavanje sportskih takmičenja na otvorenom bez prisustva publike tokom epidemije COVID-19.
- (2) Ove preporuke odnose se na provođenje mjera prilikom održavanja sportskih takmičenja na otvorenom bez prisustva publike radi zaštite organizatora, sportista, osoblja i ostalih učesnika.
- (3) Primjenjuju se na sve prostore i objekte u kojima će se organizovati sportska takmičenja.
- (4) Održavanje sportskih takmičenja bez prisustva publike dopušta se uz poštovanje ovih preporuka i svih drugih važećih epidemioloških preporuka Pododjeljenja za javno zdravstvo Vlade Brčko distrikta BiH sve dok su na snazi posebne mjere.

### **Član 2.**

Organizacija sportskih takmičenja moguća je na otvorenim sportskim objektima bez prisustva gledalaca/publike na kojima su osigurani svi higijenski i sigurnosni uslovi propisani važećim preporukama tokom trajanja mjera, za šta su nadležna i odgovorna pravna lica koje upravljaju sportskim objektom.

### **Član 3.**

- (1) Treba osigurati najmanje 10 m<sup>2</sup> podne površine po licu.

- (2) Broj lica pritom uključuje i trenere, instruktore, voditelje, organizatore i ostalo osoblje koje učestvuje u organizaciji takmičenja, odnosno sva lica koja se nalaze u prostoru za održavanje sportskog takmičenja.

#### **Član 4.**

- (1) Dozatori dezinficijensa za ruke trebaju biti postavljeni na svakih 50 m<sup>2</sup> u svim zatvorenim prostorima sportskog objekta (svlačionice, sanitarni čvor i druge prostorije u zatvorenom dijelu sportskog objekta).
- (2) Na igralištima za ekipne sportove na ulazu u teren kod klupe za rezervne igrače, sudije, delegate i ostala službena lica te oko terena uz aut-liniju na svakih od 20 do 30 m udaljenosti potrebno je postaviti jedan dozator dezinficijensa za ruke.
- (3) Kod pojedinačnih sportova potrebno je postaviti uz svako borilište jedan dozator dezinficijensa za ruke, a najmanje po jedan na svakih 200 m<sup>2</sup> unutar takmičarskog prostora objekta koji ima više borilišta.
- (4) Dezinficijens za ruke treba biti na bazi alkohola u koncentraciji ne manjoj od 70% ili drugog sredstva s deklariranim virucidnim djelovanjem prema uputstvima proizvođača i prikladan za korištenje na koži.

#### **Član 5.**

- (1) U spremištu opreme potrebno je postaviti na svakih 50 m<sup>2</sup> jedan dezinficijens za opremu zapremine 500 ml.
- (2) Na borilištu oko terena za ekipne sportove treba biti dostupan prenosivi dezinficijens za opremu na svakih 20 m, odnosno uz svaku spravu na otvorenom sportskom objektu ili uz svako borilište za pojedinačne sportove na način da je najmanje jedan na 100 m<sup>2</sup>.

#### **Član 6.**

U svim prostorima unutar objekta preporučuje se postavljanje kante za otpatke s odgovarajućim poklopcima.

#### **Član 7.**

- (1) Potrebno je osigurati dovoljnu distancu između osoblja na recepciji i drugih učesnika međusobno ili, ako je moguće, postaviti pregrade (od pleksiglasa ili sličnog materijala koji osigurava potrebnu udaljenost).
- (2) Reguliše se i ograničava maksimalan broj lica u prostoru recepcije i drugim zajedničkim prostorijama u zatvorenom dijelu objekta u skladu s mjerama fizičke udaljenosti od 2 metra.

#### **Član 8.**

- (1) Za svako takmičenje uspostaviti će se sistem vođenja evidencije prisutnih lica radi lakšeg naknadnog epidemiološkog praćenja kontakata u slučaju pojave zaraze virusom SARS-CoV-2.
- (2) Uz mjesto i datum održavanja takmičenja u evidenciju se unose ime, prezime, telefonski broj te vrijeme dolaska i odlaska predstavnika organizatora, trenera, instruktora, voditelja, sportista, asistenata i ostalih uključenih lica potrebnih za odvijanje sportskog takmičenja.

#### **Član 9.**

Sportska takmičenja smiju biti održana samo u skladu s predviđenim rasporedom i tačno onim sportistima, odnosno takmičarima i trenerima, organizatorima ili voditeljima navedenima u rasporedu te uz prisustvo potrebnog tehničkog osoblja koje je također navedeno u rasporedu.

## **Član 10.**

Ako više takmičara koristi sportski objekat za sportska takmičenja, treninge i druge sportsko-rekreativne aktivnosti, prioritete će odrediti organizator ili predstavnik takmičara zajedno s pravnim licem koje upravlja sportskim objektom.

## **Član 11.**

- (1) Dok su na snazi posebne mjere u sportskom objektu u kojem se odvija takmičenje moraju biti osigurani svi higijenski i sigurnosni uslovi, za šta su nadležna i odgovorna pravna lica koja upravljaju sportskim objektom.
- (2) Preporuke za čišćenje i dezinfekciju odnose se na sve prostore objekta (ulazni prostor, recepcija, takmičarski prostor, sanitarni čvorovi, svlačionice i prostori za tuširanje).

## **Član 12.**

Potrebno je redovno provjetravati sve unutrašnje prostore, posebno između svake aktivnosti, odnosno osigurati stalno provjetranje kad god je to moguće.

## **Član 13.**

- (1) Opća preporuka za unutrašnje prostore je provjetranje otvaranjem prozora, a manje korištenjem ventilacionih sistema.
- (2) Pri korištenju ventilacionih sistema treba posebno pratiti stanje filtera i posvetiti pažnju održavanju pravilnog stanja brzine obnove zraka u zatvorenom prostoru.
- (3) Treba provjeriti pravilno funkcionisanje opreme za ventilaciju i obnovu zraka.
- (4) Preporučuje se ventilacija s povećanim postotkom vanjskog zraka koji cirkuliše u sistemu te način rada bez recirkulacije kako bi se podsticala obnova zraka, što smanjuje koncentraciju potencijalno zaraznih čestica.

## **Član 14.**

Tokom dana potrebno je što češće čistiti i dezinfikovati zatvorene dijelove sportskih objekata u kojima se vrši takmičenje (što obuhvata sve dijelove sportskog objekta – takmičarski prostor, sanitarni čvor itd.).

## **Član 15.**

- (1) Sve često dodirivane površine u prostorima sportskih objekata koji su u upotrebi tokom takmičenja potrebno je prije i nakon takmičenja te u svakoj većoj pauzi temeljito dezinfikovati u skladu s uputstvima Pododjeljenja za javno zdravstvo i što je moguće češće provjetravati.
- (2) Posebnu pažnju obratiti na prostore svlačionica i prostore za tuširanje te sanitarne čvorove.

## **Član 16.**

- (1) Prije početka rada, odnosno otvaranja potrebno je edukovati zaposlenike o svim mjerama koje se provode.
- (2) Prije ili neposredno nakon ulaska na vidljivom mjestu neophodno je postaviti informacije o higijenskim postupcima ili postaviti informacije sa smjernicama o pravilnom ponašanju i mjerama zaštite.

### **Član 17.**

- (1) Organizatori, treneri, instruktori, voditelji, sportisti, asistenti i ostali učesnici takmičenja trebaju prije dolaska u objekat izmjeriti tjelesnu temperaturu.
- (2) Ako je u jutarnjim satima viša od 37,2 °C, ako se lice osjeća bolesno ili ima bilo koje znakove bolesti (to se odnosi na sve simptome i znakove bilo koje bolesti, a ne samo na bolesti disajnih puteva), lice se treba javiti svom nadređenom i ne dolaziti na posao dok se telefonski ne javi nadležnom porodičnom ljekaru, koji će odlučiti o daljnjem postupanju.

### **Član 18.**

Tokom boravka sportista i drugih lica u zatvorenim prostorima sportskog objekta u kojem se održava takmičenje (svlačionice, sanitarni čvor i sl.) preporučuje se držanje razmaka od 2 metra kao nužna fizička udaljenost.

### **Član 19.**

- (1) Obavezno je nošenje zaštitnih maski za lice za sve učesnike sportskog događaja tokom boravka u zatvorenim prostorima, osim u slučajevima kada to onemogućava obavljanje djelatnosti.
- (2) Na otvorenom prostoru obavezno je nošenje zaštitnih maski za lice licima koja ne učestvuju aktivno u takmičenju.

### **Član 20.**

U slučaju potrebe za prisustvom zdravstvenog radnika tokom aktivnosti, on je pri bliskom kontaktu dužan koristiti odgovarajuću zaštitnu opremu, odnosno hiruršku masku u kombinaciji s viziorom.

### **Član 21.**

Nakon korištenja rekvizita, sprava i ostale opreme potrebne za takmičenje takmičar ili za to zaduženo lice dužan ih je dezinfikovati odmah po završetku takmičenja.

### **Član 22.**

- (1) Svakom sportisti se preporučuje upotreba vlastite boce s tečnošću koja je označena imenom kao i ostalih potrepština koje moraju biti u torbi označenoj imenom.
- (2) Boce za napitke i ostali otpad nastao tokom takmičenja odlažu se u za to predviđenu kantu za otpatke s dvostrukom vrećicom i odgovarajućim poklopcem.

### **Član 23.**

- (1) Nakon takmičenja sportisti i ostalo osoblje uključeno u takmičenje ne zadržavaju se u prostorima duže nego što je potrebno.
- (2) Boravak u svlačionicama i prostorima za tuširanje treba svesti na nužni minimum.

### **Član 24.**

- (1) Dolazak drugih lica (npr. majstora, kurira i dostavljača) treba organizovati na način da se prije dolaska ta lica telefonski najave.

- (2) Tada se provjerava ima li lice simptome bolesti COVID-19 (povišenu tjelesnu temperaturu, kašalj, otežano disanje / kratak dah, grlobolju, poremećaj čula mirisa i ukusa, proliv) i je li bilo u kontaktu s oboljelima.

### **Član 25.**

Konsumacija hrane i pića u za to predviđenim dijelovima objekta provodi se prema već propisanim mjerama Pododjeljenja za javno zdravstvo.

### **Član 26.**

Ova naredba stupa na snagu danom donošenja, a objavit će se u „Službenom glasniku Brčko distrikta BiH“.

#### **DOSTAVITI:**

#### **GRADONAČELNIK**

Mr. sc. Siniša Milić

1. Uredu gradonačelnika,
2. Zamjeniku gradonačelnika,
3. Glavnom koordinatoru Vlade Brčko distrikta BiH,
4. Sekretaru Vlade (3x),
5. Odjeljenju za zdravstvo i ostale usluge  
- Pododjeljenje za javno zdravstvo,
6. JZU „Zdravstveni centar Brčko“, Brčko distrikt BiH,
7. Svim odjeljenjima Vlade (12x),
8. Uredu gradonačelnika / Inspektorat,
9. Policiji Brčko distrikta BiH,
10. Članovima Štaba (34x),
11. Ministarstvu sigurnosti BiH – Granična policija BiH,
12. Institucijama Brčko distrikta BiH (8x),
13. Javnim preduzećima, fondovima i Zavodu (7x),
14. „Službenom glasniku Brčko distrikta BiH“,
15. Arhivi.